

江夏縣志卷之十一

武昌府江夏縣知縣陳元京纂修

流寓

江邑居會城要地爲八省通衢官之任茲土者攬山川之勝樂舟車之便輒留止其閒歌於斯哭於斯子孫遂占籍應試於斯他如權子母計客芙蓉幕者亦因其便而宅爾宅田爾田焉人爲事繫家以地遷類不乏才人達士也作流寓志

漢

江夏縣志

卷之十一

流寓

一

禰衡字正平原人少負才尚氣曹操欲見之不肯往操懷忿欲殺之遣送劉表後侮慢表表不能容江夏太守黃祖褊急故送衡於祖祖長子射爲章陵太守尤善於衡射大會賓客人有獻鸚鵡者授簡於衡因爲賦筆不停綴文不加點後爲祖所害

晉

戴仲若譙郡人水經注黃鵠山林閒甚美仲若野服居之

宋

王欽若臨江人父仲華侍祖郁官鄂州母李氏將免娠會江水暴溢亟遷黃鶴樓卽生欽若

范純粹蘇州人仲淹子累官龍圖閣直學士知金州坐元祐黨落職鄂州安置

李綱邵武人宋名相建炎初罷爲觀文殿大學士提舉洞霄官會陳東言黃潛善汪伯彥不可任綱不可去後有旨綱落職居鄂州

張山翁字君壽其先普州人景定三年進士德祐元年爲荊湖宣撫司幹官鄂守張晏然議納款山翁以書讓

江夏縣志

卷之十一

流寓

二

之晏然旣降山翁被執令降不屈行省官賈思貞義之貸不殺後居黃鵠山聚徒教授而終有南紀緇林藏雲山相鉏諸書

元

沈如筠字無回號嵩菴本南昌籍仕元爲觀文殿大學士見元末世亂棄官隱於楚黃復徙江夏之靈泉山家焉明洪武初徵不起置義田四百畝積穀於寶峯寺中以賙貧士後有名賁者以進士官常雷二州同著有寓常集寓雷集或曰終按察使司

明

楊士奇廬陵人洪武初爲學官以失印避罪至武昌流落無依變名楊立可時楊仲舉戍武昌士奇途中值雨偶憇仲家見其方爲童句讀與談相契士奇善易遂許授焉仲舉卽以館與之而自教授於他處

楊仲舉姑蘇人洪武間戍武昌楊文貞公避地過其家立談投契遂爲患難之交文貞被薦乃相援引仲舉累官尚書

牟斌韋璽俱錦衣衛指揮正德初淮安知府劉祥忤劉

江夏縣志

卷之十一

流寓

三

瑾逮祥下獄使斌璽訊之二人明祥非罪瑾矯制謫斌璽沔陽衛百戶後徙居江夏嘉靖初俱復其官

沈鍾應天人宏治閒任湖廣提學副使發明經旨士習丕變遂家江夏性恬淡所居一室圖書數卷焚香靜坐而已

吳勤字子勤以先世居廬山號匡山樵者居鄂又號黃鶴山樵晚更號幽翁洪武初被徵除武昌教授以詩名時有晉人風格不擇紙筆老年燈下小楷片時數千湘獻王遺以詩有清才美德冠時儒辭翰欣看逼褚虞之

句

趙邦周陝西鞏昌府成縣民壯也江夏劉士元官成縣尉僅三月忤鑛監被拘於會城左右皆逃匿獨邦周從之及元獲釋邦周又送之還籍留寓八年及劉死囑其子曰邦周自患難相隨十年我死當厚遣之邦周不忍去廬於墓鄉人義之言於邑侯徐魯人月給穀一石不受復言於邑侯樊鍾陽亦給穀又不受樊高其義立坊室前額曰義民之廬大司馬熊廷弼爲傳

馮雲路字漸卿一字畏菴黃岡名諸生也年三十棄舉

江夏縣志

卷之十一

流寓

四

子業從相國賀文忠講學著孔孟真參左傳智定周子通書及用書百餘卷崇禎辛巳莆田林按楚特疏其賢採用書進覽下部議不報癸未城破投寧湖以死年四十有六

汪陞延一名三奇字確菴黃岡諸生嘗註五經成癸未城破死之

熊霽字渭公一字立齋黃岡諸生與金正希章莪山馮畏菴相友善懷宗癸未五月城破先一日與諸友別云丈夫當從節義中尋實地某明日於某樹下書熊渭公

死所幸爲語母弟已而果至某樹下爲賊得迫之降不  
屈中以刃大罵曰賊逆焉敢辱我奮身投荷池死越三  
日顏色如生著有性理格言春秋主左十三經注疏評  
畧大易參其齋文集

國朝

張尚忠字伯達長洲人幼入南雍授楚黃陂貳尹時流  
寇蜂起忠畫策守城有功擢黃陂令致仕後寓居塗口  
鎮與邑士大夫往來贈答人皆想望其丰采子耀康熙  
己酉登賢書別有傳

江夏縣志

卷之十一

流寓

五

張汝瑚字夏鍾福建人弱冠中崇禎壬午鄉試歷仕安  
陸別駕以事去官流寓會城講學著述竟日閉戶默坐  
操選政刻唐宋大家文選明宋劉諸公爲四大家選明  
歸茅諸公爲八大家自著匏野集數十卷年七十餘卒  
徐惺字子星號卽山江南江寧人由進士起家歷分守  
武昌道晉湖北布政司內艱不起僑居江夏闢高觀山  
爲東山小隱亭台樓榭曲折匠心蘄州顧景星爲之記  
戊辰裁兵譁變夏逢龍以公負重望百計物色不可得  
及大師復會城公在高觀無恙也公居江夏前後十五

年山川洞壑靡不經歷所至輒有題詠康熙丙子卒  
潘永祚字太邱號恕菴先世浙之上虞人父允隆以孝  
廉宰南安之崇義卒於官會國變永祚奉母李及幼弟  
四人避亂虔中貧無以爲生賣字給朝夕後以永清拔  
貢除雲南瀾沙井提舉知滇事將變以乞養歸僑居江  
夏築室高觀山麓與弟國祚詩文擅一時之勝所著恕  
菴若干卷藏於家  
毛會建字子霞別字客山常州武進人少寓越補錢塘  
弟子員以副貢除樂昌令

江夏縣志

卷之十一

流寓

六

國初避跡嶺海平靖二藩收粵耳其名物色之一夕遁去  
歷虔入楚契晴川黃鶴之勝僑居會城後復縱遊襄郢  
賣字燕市晚歸江夏年七十餘卒會建工文善詩書法  
直逼晉魏六書篆刻精絕一時居江夏輯黃鶴樓古今  
詩授之梓摹岫嶺碑勒石大別其大書千字文字皆踰  
尺用筆盡勢學使鄭崑璧爲鋟板行世  
蔣鑰字玉淵常州武進人工詩好遊足跡遍天下晚適  
江夏有終焉之志方伯徐惺鑰同年友也闢桂實堂相  
與倡和乙丑冬客容美歷平山九峯二酉天泉諸勝十

旬得詩三百有奇晚年豪邁自喜嘗曰會當騎白鹿雲  
中俯視蒼蒼九點耳年八十餘卒

周寅暘字秩先號別菴郢天門人籍鄖西登康熙壬戌  
進士令臨潼爲治簡易和平歲值奇荒人民饑饉巨憊  
王金山穆義等嘯聚山谷沿鄉剽掠惡氛熾甚暘訪巨  
魁殲之餘黨悉平時飛蝗八境蔽天而下虔誠步禱蝗  
頓退飛士民謳謠載道嘗於渭南鄰屬捐資乞糴民賴  
以生他如興學校除積弊力懇各上憲奏請緩征豁賦  
詳請開復文武避荒諸生旋註吏議調閩縣尉佐邑有

聲官閩十餘載潼人誌入循良兩攝邑篆不避權貴會  
勢宦林豫吉林維蘭等武斷鄉曲凌虐平人闔省憚之  
詳陳總制郭鞠之廉得其狀按以法中丞李思義重修  
書院令主講席士習丕變丁父艱解組歸僑居江夏杜  
門恂謹不涉時事當事陳中丞誥李方伯錫咸器重之  
歲時一刺之外不敢妄干其生平砥行類如此所著時  
藝京稿經張孝緒吳小曼評選行世子厚祉少穎悟遊  
江夏庠蚤天次作高亦逝弟寅昉天門諸生寅曠俱克  
世其家學

南天祥原籍荊州任江南松江提督入籍江夏子應泰  
中乾隆庚午科舉人任安慶同知孫光曜中乾隆壬申  
科舉人長孫光照以廕生官主事

魯宗淳字質夫原籍安徽太湖縣祖重光以平吳逆功  
任雲南永順鎮總兵父之裕中康熙庚子科由內閣中  
書歷任湖北安襄鄖道忠淳隨父任遂入籍江夏孫行  
煌行煥俱列縣庠

李根雲原籍雲南大理府趙州康熙戊戌科翰林丙午  
科典試山東任江西驛鹽道入籍江夏長子秉煦候選

江夏縣志

卷之十一

流寓

八

從九品次子秉衡以江夏籍官江南盱眙縣知縣秉熺  
官廣東香山縣淇澳司巡檢

陳齊紳原籍廣西乾隆壬申科進士翰林院編修入籍  
江夏子聖詔邑歲貢生聖詮邑庠生



江夏縣志卷之十一

武昌府江夏縣知縣陳元京纂修

隱逸

士君子讀書自命伊豈不願出而有爲以表見於當世然而艱於君臣遇合遂蕭然遠引以自放於山巔水湄之間者有之亦有性本恬澹寧爲伐檀以終老者居賤食貧晏如也江邑勝地名區煙霞泉石不乏高蹈之士雖較乘時利見霖雨蒼生者有間要之因寄所託永矢弗諼蓋亦有足多者焉作隱逸志

江夏縣志

卷之十一

隱逸

一

漢

馬廖字文起父爲北地太守永初四年坐羌事下獄死廖感父以法喪身憚爲吏嘆曰老子有言名與身孰親吾豈爲名乎遂絕志世外教授鄉里數百人尤明天文風角之術辟召不往時號北郭先生年八十終於家

潘志

作沙  
羨人

晉

李廡字宗子祖康泰州刺史父重平陽太守世有名望廡好學善草隸與兄式齊名躄疾不能行坐嘗仰臥彈

琴讀誦不輟河間王辟太尉掾以疾不赴後避難隨兄南渡司徒王導辟之廡曰茂宏乃復以一爵假人廡嘗爲二府辟故號李府

潘志作江  
夏鍾武人

張公名未詳相傳張公洲其所隱居也

宋

李昌國教子長子康侯河陽守次康年監丞善古篆與蘇軾黃庭堅游次康直左司員外郎休官歸里自稱裕老

杜淦自稱漢陰老人居水濱戴笠躬耕嘗曰仕者忍恥

江夏縣志

卷之十一

隱逸

二

耕者勞力皆大造之委悅耳吾何心哉

胡叔居家蒿室草徑唯酒自適嘗謂人曰我此生活似勝焦光不治生產饑貧不以爲恥養子卽呼曰螟蛉恒乘一犉牛布囊容三四升飲噉醉飽便盛所餘以付螟蛉

蛉

明

吳徹字文通雅善吟咏家貧落魄好奇節元末天下亂爲陳友諒所得置諸親密呼爲先生歲壬寅友諒進攻豫章遣徹微行覘探爲明太祖所獲親釋其縛問曰聞

汝能詩爲我賦天閑百馬圖徹應聲曰問君何日渡江  
來百騎如雲畫鼓催九十九中皆汗血當頭一箇是龍  
媒太祖擊節不忍殺又度其終不爲用欲以戲友諒乃  
刺詭譎秀才四字於面遣還友諒惡之曰安有如此形  
容而可爲我先生者乎徹遂掉小舟遯去後友諒敗死  
次子陳理奔還武昌守堅城久不下太祖怒將屠城忽  
有稱詭譎秀才求見者召入問曰汝安得尚在此良久  
復命題西山夜雨詩徹復應聲曰莫厭西山夜雨多也  
應添起洞庭波東風肯與周郎便直上金陵奏凱歌太

江夏縣志

卷之十一

隱逸

三

祖遂下令班師還建康後屢下詔物色之徹竟辭不出  
曰吾面目可憎

李萃然字仁夫工詩精六書故與大學士張治善張雅  
欲用之特造其門覩壁間詩有曰文章自古有定價用  
舍一時無定名張爲憮然

朱華園字淮仙楚宗藩中尉英照次子六歲就外傳卽  
舉大學二字問師曰此何等學也師奇之十四通古今  
不屑就試二十好新建之學及周程朱陸諸書會通一  
貫之旨尤肯著述有滙書宋元詩選暨梅湖桃溪諸集

晚更爲一書曰聖賢寶鑑論列聖賢發揚忠佞五十萬  
言崇禎癸未三月夢遊石壁見有詩云飛泉如白鶴隱  
見渡平林暗壁流花瓣漁郎何處尋隨告親友曰時危  
矣去之可也卽棄家遯入桃谿不知所終

燕遺民字逸德號空空老人累以賢良徵不赴翛然獨  
往深山絕壁或臨水濱嘯歌終日嘗作感興詩云寥落  
湖山曲憑誰話起居出門唯山水相見但樵漁酒熟還  
堪漉葵荒欲自鉏久深泉石想早晚賦歸與又云泉谷  
煙火靜林塘暑氣清幽花籬落見好鳥竹間鳴禾黍皆

江夏縣志

卷之十一

隱逸

四

豐稔桑麻自長成遠聞茅屋裏燈火讀書聲

張鍾靈字一卿其先武昌人後徙江夏中宏治戊午解  
元隨晦跡家塾脫然聲華之外終身不仕

方一清字汝登號愛溪嘉靖癸卯舉人任知縣致仕歸  
隱爲雲林隱社之一

沈韻字四聲家世業儒兄弟四人韻居次早孤補弟子  
員淡於進取左轄南徐王公冀偶閱韻西湖詩雅好之  
延至幕中楚城陷韻母弟家屬次第淪沒乃隨王公遨  
遊吳越釣臺虎邱五湖匡廬之勝皆窮搜之久乃歸楚

營葬母氏畢卽廢棄諸生隱梁湖之孤山偕妻鉏圃賣藥自給嘗采蔬於蕪有士者奮臂相加笑謝之樵於山初不習運斤傷左肘臥數日不起邨人皆笑之久咸敬愛呼爲沈秀才間持黍相造請論古和歌晝則分羹爲餐夜則借邨人之箕薄以蔽風露因自號蓑菴處士足不履市者二十年卒年五十有二韻工書畫尤喜爲詩頗多散佚邑人王一寧收其遺稿付之剞劂焉

趙全節字友松九歲失父嘗敝笈羸馬走吳越燕趙間顧憲成延入太學作序贈之懷宗季忽遯跡巖谷鄂城

江夏縣志

卷之十一

隱逸

五

破不踐其難晚乃殫心性命之學

國朝學使郃公援招隱例屢徵不報年七十有九以遺藁付其子三學三緘曰吾歸矣當葬吾以皇甫謐楊王孫之例

艾然字然明一字木田弱冠補弟子員卽淡於進取詩酒自豪所居東門外築圃蒔花諸王孫多從之遊懷宗癸未城陷挈妻子走避鹿泉山拾野蔬自給後妻死益自放

國初返東郭結茅舊址手種桃梅花果而題其居曰萬木

園署其門曰賣花沽酒讀書務覽大概不求甚解以意  
自作春王正月辨及周易疏一空勦說性孤戇視塵俗  
如廁見非禮事輒髮豎皆裂聞其譏彈者每用爲韋弦  
晚年氣稍平易置其齋曰待盡菴年七十有三卒蓋古  
之逸民也

國朝

周家鼎字峙鉉其先大冶人中懷宗己卯舉人癸未獻  
賊陷城鼎奉父母竄伏湖濱父沒乃築室梅城題其門  
曰知止與母偕隱因自號梅城

江夏縣志

卷之十一

隱逸

六

國朝順治己丑歲當會試臺司敦促不獲已就公車比入  
闈迅筆疾書卽交卷出分考金某得卷亟賞曰如此高  
篇何以七結俱無遂置乙榜是時乙榜有選用中書例  
捷音至里門其母曰吾兒志不忍離膝下圖溫飽乃以  
捧檄勞我倚門乎越數日鼎果旋自是杜門不出潛心  
學道間聚里中素封者困積以備荒倣常平義倉之法  
條其可行爲一書效之當事嘗效涑水洛下聯爲真率  
會而性磊落不留心家人生業屢致窘乏丙辰楚大饑  
大司馬張朝珍欲令官司及紳士俱輸粟助賑雅不欲

以官吏擾民乃屬鼎鼎曰此固吾願吾前亦行之里中於是殫經畫全活不下億萬計晚年喜著書尤念邑先賢熊廷弼吳裕中賀逢聖信史未立各爲傳以表之又任修文廟之役先是二丁祭外諸生白首有不知先師誕辰者乃率兩庠子弟卽八月二十七日舉慶禮自是歲以爲常其居母喪不御酒肉者三載所著有家禮議宜及易詩貞通諸解學者稱梅城先生子國貺魏廷謨字溟一明諸生也高才博學性恬澹絕意仕進好讀書年九十猶事箋註手不釋卷生平和易欵曲不

立崖岸至大節所繫凜凜乎繩尺不踰前輩鍾惺譚元春輩皆引重之

王師字淑餘邑名諸生也隱處湖山不求仕進精字學得魯公筆法浙江總制趙廷臣聞其名禮爲上賓師終不合而去

蔡其煥字兩淑明府學廩生也性恬澹不悅仕進精於易理尤究心口洛關閩之學閉戶著述扁其門曰澹園弟其焯邑諸生亦潛心理學明末隱居鞍山著有大易補註兵燹散失

楊懋官字德懋賦質聰穎博治羣書爲文古雅秀逸性端介年十五列府庠中天啟丁卯副榜授河南嵩縣教諭甲申之變棄官歸隱晚年以輿圖自隨按圖遊歷所至歛歔憑弔多所撰述著有三經畧古今文畧史觀掌全騷注莊畧學庸說等書燬於兵

胡金絃字汝實幼抱大志下帷攻苦值國變絕意進取律己端方與人直諒鄉人皆稱長者以子潤貴贈如其官

余注字明福性介直不阿爲郡諸生後棄舉子業隱湘

東之青山黃冠野服躬耕自給著周易刪補自號拙菴徐封魏字青芝食餼縣庠以禮記中崇禎壬午科乙榜國變遯跡北門山居惟著書講學所著有禮記明述行世  
任之奎字次璧十歲擅文譽壬戌歲薦廷試歸小圃短徑誅茅構宇作斗室一區自比康節安樂窩吳升東侍御贈以詩云文章垂老功偏篤出處安貧道更堅蓋實錄也

容朝周字中含邑諸生性孝友兄弟六人白首相友爱



澹於仕進寄情詩酒與同邑  
龐載孫明滋洪石碣相唱  
酬著有石山小草藏於家

李居上字尊之上生而穎異弱冠工舉子業受知於郡  
守洪賊變城陷怙恃俱失涕泣哀慕有勸進取者曰人  
生奮志雄飛期榮親耳吾親見背即殊遇何益待弟甘  
苦與共處鄉黨和氣盎溢無貴賤老幼一待以坦易至  
誠壽八十七而終子廷謨庚辰進士

江夏縣志卷之十一

武昌府江夏縣知縣陳元京纂修

方伎

學稼學圃曾小樊遲執射執御又勗及門何其言之互異也然天下容有馳心遠大之士自謂無所不能及閱歷既久而始歎專家之難者矣人幸遊聖人之門固當務其遠者大者而亦不遺於近小理本一原事則分見君子特不爲之要未嘗輕棄之也小道可觀作方伎志

江夏縣志

卷之十一

方伎

一

晉

李式字景則官至侍中善草隸弟定子公府能書同式

唐

朱翁鄂州道者州將陳士明常蓄鬪雞翁見雞卽知其勇怯聞其鳴卽辨毛色又得縮地術築室穿地環布果藥手種松檜皆成十圍而未嘗遊於城市

五代

韋道豐善畫人物寒林逸思奇僻不拘小節當代珍之朱簡章工畫人物屋木

梅竹思一作再思畫人物牛馬最工於雞爲南唐李氏翰林待詔

宋

李康年字樂道好古博雅而小篆尤精黃庭堅謂康年晚年悟籀篆下筆自有可喜直本曲鉞得之自然秦丞相斯唐少監陽冰不知去樂道遠近也

滑世昌鄂州都統司醫官居南市家貲積萬歲荒疫自捐錢藥救療淳熙中夢客來訪車從甚都云此邦明日有災君家亦當墮此厄君平日多所濟活神特救之其

江夏縣志

卷之十一

方伎

二

妻夢亦如是至日大風夜半火作滑居灰燼忽有壯夫數十輩著紫衫執篙十乘列火邊驅家人登之舁至野逕俄風雪大作人籬不見一家皆存於煤中得三十餘金遂免凍餒

趙賓王工傳寫

明

黃卓官翰林學士善草書亦善章草

陳搆字仲謙永樂中寫太宗御容稱旨

吳偉字次翁少孤貧善繪畫之技不師而能山水人物

入神品性戇直有氣岸與俗寡諧求者非其人不應又好劇飲或經旬不飯成化間成國公某延至幕下一見以小仙呼之因以爲號平江伯某禮聘渡江聞譽日起憲宗皇帝召至闕下授錦衣鎮撫待詔仁智殿偉有時大醉被召蓬首垢面曳破皂履踉蹌行中官扶掖以見上大笑命作松泉圖偉跪翻墨汗信手塗抹而風雲慘慘生屏幃間左右動色上嘆曰真仙人筆也偉出入掖庭奴視權貴權貴人求畫又多不與於是權貴人怒數短之放歸南都孝宗登極復召見便見命畫稱旨授錦衣

百戶賜畫狀元印章西街居第寵賚日厚逾二年偉稱疾得歸居秦淮之東涯正德三年五月武帝遣使召之使者至未就道而中酒死

宋學古詩清麗性恬靜水邊靜坐終日不倦斲桐造琴精妙莫及顧性懶慢三年不完一琴武昌守某聞學古名欲見之竟逃去

羅鍊故儒家深醫學診脉斷人生死不爽御史李某吐墨痰診之曰是殆有所思不遂也李起拜曰神醫也吾少貧納婚某氏爲婦翁所嫌離去婦爲我死吾不忍婚

耳服藥立愈楚王妃周氏微恙診之曰是殆不起卽在今午時妃猶飲食言笑王不信未幾中風逝一傭人自言某無病第覺首在下足在上羅俯首良久曰地下鐵杵重六十斤汝試捧而上捧而下如是者三日病頓愈問其故曰汝以用力傷經絡心逆轉特爲反正之耳如此類者甚多著醫書授其子一日子乘醉爲人視疾鍊怒曰奈何以人性命爲兒戲焚其書無傳者

趙夢弼字肖野先世浣川人徙居江夏年至八十因呼肖翁家世受醫精脈法凡診諸病者形神俱往徐以一  
江夏縣志  
卷之十一  
方伎  
四

二語發其隱結投藥立效胡方伯病且死搆木以待邀翁至醫兩七而痊赴人之急百里外中夜叩門無不應者旣老猶杖以往歲大禊煮藥如池全活甚衆年八十八一日忽徧辭所識無疾而逝

#### 國朝

傅之鉉字木希其先四川長壽業舉子以攻苦過得咯血疾乃旁通於醫會天下兵起滄桑變革鉉乃醫隱於楚精太素脉理決死生休咎如桴鼓應李學使可汧試其術使二女子年相若者各一手隔幃診鉉曰此兩人

也李訝曰君晰微似郭矣丁中丞念我自豫撫楚診之曰公脉君相二氣交和將坐遷制府矣其診理卿李文蓀曰秋得春脉弦且長草青當痛左脇而終既而果然診張中丞湖陽出謂人曰撫軍脉大粗且急他時其不免於城且乎劉方伯罪擬伏質診之曰得輸鬼薪當無恐皆奇驗所著有四診纂要諸書藏於家

何鏜字鎮遠太學生工愈越之術全活甚衆康熙十九年安清王自滇旋邁疾須藥有司以鏜應投藥輒效王喜賜晏以國手稱之共飲食者彌月任醫學詳請印信

江夏縣志

卷之十一 方伎

五

賑恤獄囚請捐藥餌著爲例其他敦本睦族賑貧起瘠事甚夥

陳德潤字廣譽明岳常兵備陳鼇五世孫幼遇異人授醫術尤工幼科全活無數前總督郭秀六十始舉子三齡患便廕諸藥不效潤曰此蟲也發於陽明下小蟲數百立愈藩伯王燕少子患痘症氣已絕潤察其色曰是尚可治火攻之後繼以藥餌按期奏效其他奇驗如此舉鄉飲耆賓年八十五卒

吳宏明字玉路善草書以筋骨勝雖販夫牧豎不識之

無一見皆知爲玉路書以字行占澧陽籍補諸生考康熙戊子正貢世居金口

胡同夏字元馭善小楷

吳銓字衡三善行草

袁枝字松壑善畫山水

韓周善畫人物其子松亦善畫

黃道淳字又朴本楊姓以醫著內經本草默誦無遺馬撫軍嘗面試之視張某病至其堂聞咳聲曰不可治也卽謝去果卒邁制軍夫人病劇診之決以明日戌時留

江夏縣志

卷之十一

方伎

六

署驗之信然診制軍壽脉曰公脉洪大冲和行當大拜果未幾入閣兩江趙制府欲薦之太醫院固辭不可劉名顯號克順精外症觸手卽效品端正有古君子風年踰八十無疾而卒